

AFRICA NOVA

Africa una ex tribus orbis partibus, latissima est regio multorum regno-
rum, populorum, animalium, fluuiorum, montium & desertorum refer-
tissima, hodieq; à Portugallensibus circum nauigatur, quia Portugallia
soluentes recta in austrum tendentes, primum Gades insulam prætereunt,
deinde Mederam insulam quæ hodie à Lusitanis incolitur, patetq; circuitu 40. mi-
liarium. Ferax est saccari & uini, Cretico uino nequaquam cedentis. Post Canarias
adeunt insulas, quarum nomina sunt, Canaria, Teneriffa, Palma, Fracta læcea, Ma-
gnafors, Grancamaria, Gienera, Ferrū. His relictis Caput album petūt, ubi tellus
tota est arenosa & deserta, alba & arida usq; ad Nigritas. Succedit Capiti albo Si-
nus Dargin & insula eiusdem nominis. Est & post Caput album in mediterraneis
locus quem Hodenum appellant, & hic nullo clauditur muro, sed diuersorium est
Arabum & statio camelorum. Eius regionis incolæ uiuunt ordeo & cariotis, qui-
bus ubertim abundant. Mahumetum colunt & Christianos oderunt. Senega fluui-
us qui has terras sequitur & totam ferè Aethiopiam interiorē irrigat, Azanegos à
regno Nigritarum determinat. Sunt autem Azanegi homines pauperes & menda-
ces, proditores & prauos seruantes mores. In regno Senegæ est locus nomine Ta-
gaza, unde ingens copia petrei salis aueritur camelis Arabum. Cæterum ferunt
flumen Senegæ deriuari à Nilo, easdemq; uices cum eo habere. Nam ut ille Aegyp-
tum, ita hic Aethiopiam reddit irriguam. Rex Senegæ pauper est & nullas habet
urbes, nec annuos redditus & præterea regnum eius angustos habet limites. Ha-
bet regnum Senegæ ab oriente regionem Tuchmoram, à meridie uero regnū Gam-
bræ, uersus autem septentrionem Nigro fluuiο clauditur. Sequitur caput uiride, sic
appellatum quod consitum sit arboribus densissimis eisdemq; uirentibus conti-
nuo ferè anno. Huic finitimum est regnum Gambræ, in quo homines habitant fero-
ces & sequi subditi cum rege suo magno regi Mellis, qui magnus imperator Nebeo-
rum dicitur. Habet regio illa elephantes syluestres, qui non cicurantur. Huic reg-
no succedit uersus austrum regio Casamanse à fluuiο Casamanse sic dicta. Hinc à
sinu Rubro reflectitur Continens in orientem, & antequam peruenitur ad Caput
bonæ spei, extremam Africanæ terræ aciem, occurrunt uarię gentes, inter quas quę
dam nudæ incedunt ut ex matris utero exierunt, carentes omni uerecundia.

Inueniuntur ibi uaria auium genera, præsertim psittacorum multijugi
coloris à quibus & terra illa Terra psittacorum denomi-
natur. Reliqua patent ex tabula.